



Høringsinnspel - planprogram regional plan for klima

Saksbehandlar:
Birte Aasen

Arkivkode:
122K00

Arkivsaksnr.:
21/3607

JournalpostID:
21/28687

Saksnr: 97/2021	Utval: Bjørnafjorden formannskap	Dato: 22.06.2021
---------------------------	--	----------------------------

Kommunedirektøren sitt framlegg til vedtak:

Kommunestyret stiller seg bak administrasjonen sitt forslag til høringsinnspel.

Bjørnafjorden, den 18.05.2021

Christian Fredrik Fotland
Kommunedirektør

Behandling og vedtak/uttale i følgjande utval:

BJØRNAFJORDEN FORMANNSKAP 22.06.2021:

Behandling:

Varaordførar Mikal Leigland leia ordskiftet medan Trine Lindborg hadde ordet. Representanten Tina Bøe Buer peika på ei setning under høyringsuttalen Tema 3 Sikre naturmangfald (2. setning), som nok ikkje er i tråd med intensjonen og bad administrasjonen sjå på dette. Kommunedirektør Christian Fotland lova å gjera det. Kommunedirektøren sitt framlegg til vedtak blei samrøystes vedtatt.

Vedtak:

Kommunestyret stiller seg bak administrasjonen sitt forslag til høyringsinnspel.

Vedlegg:

Høyringsutkast planprogram - Regional plan for klima

Samandrag av saka:

Vestland fylkeskommune legg no fram framlegg til planprogram for Regional plan for klima 2022-2035 på høyring. Innspelsfristen er 18. juni 2021.

Fylkeskommunen ynskjer særleg tilbakemelding på følgjande punkt:

- Val av plantema
- Problemstillingar som er viktige innan dei føreslegne tema
- Medverknad i planarbeidet
- Andre relevante innspel i planarbeidet.

Planprogrammet legg opp til fem plantema for å dekke Vestland sitt arbeid med klimaomstilling og berekraftig samfunnsutvikling:

- Redusere klimafotavtrykket
- Fjerne direkte utslepp
- Trygt og robust Vestland
- Klimarettferd og folkehelse
- Sikre naturmangfald

Konsekvensar av saka/vedtaket:

Økonomi: Tiltak og verkemiddel som følgjer av ein ny regional plan for klima vil vere positivt, særleg økonomiske tilskotsordningar.

Klima: Planprogrammet legg opp til fem plantema for å dekke Vestland sitt arbeid med klimaomstilling og berekraftig samfunnsutvikling.

Folkehelse: Planprogrammet legg opp til fem plantema for å dekke Vestland sitt arbeid med klimaomstilling og berekraftig samfunnsutvikling.

Saksframlegg:

Generelt

Bjørnafjorden kommune er positiv til val av plantema. Kommunen har lagt berekraftsmåla til grunn i si planlegging, og meiner derfor at det er viktig at fylkeskommunen slår fast at «Klima og miljø – ein premiss for berekraftig samfunnsutvikling». Det er særleg viktig for Bjørnafjorden kommune at ein regional klimaplan tydeleggjer korleis fylkeskommunen tenker

Saksframlegget er godkjent elektronisk og har derfor inga underskrift

å vere med å klimaomstille heile Vestland, slik at ein slik regional plan kan legge til rette for kommunane og deira arbeid med klimaomstilling.

I planprogrammet står det:

«Planen skal skildre korleis vi skal legge klima og miljø som premisser for samfunnsutviklinga, og tydeleggjere kva dette vil bety i praksis. Planen vil vise strategisk retning i klimaarbeidet, og vurdere ulike strategiar og verkemiddel for å vere pådrivar for klimaomstilling og nullutslepp innan 2030.» (s. 4 i planprogrammet). Bjørnafjorden kommune meiner dette er bra, og meiner at slike strategiar og verkemiddel kan vere avgjerande for kommunane sitt arbeid, og resultatet av dette.

I planprogrammet blir omgrepa «verkemiddel» og «tiltak» nemnde fleire gonger, og saman med gode kunnskapsgrunnlag, er dette viktige hjelpemiddel for kommunane. Det er avgjerande for det regionale klimaarbeidet at fylkeskommunen bidreg med gode strategiar og tiltak, oppdaterte kunnskapsgrunnlag og til slutt, men kanskje viktigast, målretta verkemiddel for å hjelpe kommunane. Dette kan bidra til at den regionale planen for klima faktisk blir eit hjelpemiddel i kommunane si klimaplanlegging.

Tema 1 Utsleppsreduksjon

Vestland fylkeskommune har sett seg mål om å «reducere klimagassutslepp med mål om nullutslepp innan 2030.» Det framgår ikkje av planprogrammet kva som faktisk ligg i omgrepet «nullutslepp», og heller ikkje kva dette betyr for ulike aktørar og sektorar. Bjørnafjorden kommune ser at dette er noko som står på lista over kva som skal gjerast i planen, og vil understreke at dette er særst viktig – og for kommunane. Skal kommunane vurdere å gå inn for dette målet, må det vere tydeleg kva dette inneber og kva som ligg i det.

Tema 2 Trygt og robust Vestland

Bjørnafjorden kommune meiner det er positivt at fylkeskommunen i regional plan for klima har ei brei tilnærming til klimatilpassing, og at planen vil identifisere og prioritere innsatsområde for å redusere klimarisiko for innbyggjarane i Vestland. Kommunane spelar ei sentral rolle i dette arbeidet, og det er derfor viktig at dette skjer i tett samarbeid med kommunane.

Bjørnafjorden kommune stiller seg bak vurderinga av å særleg ha fokus på naturbaserte løysingar for klimatilpassing, og det vil vere til god hjelp for kommunane at det blir utforma felles retningslinjer for korleis ein arbeider med klimatilpassing. Det er imidlertid viktig at dei lokale forholda i den enkelte kommune her vert tatt omsyn til.

Tema 3 Sikre naturmangfald

Det er viktig for kommunane å ha oppdatert kunnskapsgrunnlag om naturmangfaldet i den enkelte kommune, og tilskot til å få utført slike kartleggingar vil vere viktig for kommunane. Det er positivt at planen vil identifisere tiltak for å redusere naturmangfald som har direkte effekt på utsleppsreduksjon og klimatilpassing. Også her vil det vere viktig for kommunane at det blir etablert tilskotsordningar.

Tema 4 Klimarettferd og folkehelse

Det er ein klar samanhang mellom klima og folkehelse, og Bjørnafjorden kommune er glad for at «Mål og tiltak i klimaplanen må difor ha merksemd på sosial ulikskap i helse, og ha mål om å verken redusere levekår, eller livskvaliteten til innbyggjarane». Under «Kva skal vi gjere» står det imidlertid «Vi skal forsøke å sikre at mål og tiltak i klimaplanen ikkje skal forsterke sosial ulikskap i helse og økonomi.» Bjørnafjorden kommune meiner at dette er noko ein skal sikre i ein slik plan, og vil derfor be om at «...forsøke å...» vert fjerna frå dette punktet.

Bjørnafjorden kommune meiner det er veldig bra at fylkeskommunen vil bidra med kartlegging av «...tilgjengeleg kunnskap om klimaendringar i Vestland og helsekonsekvensar av dette, og vurdere om sosiale skilnader påverkar utfallet». Vi vonar dette kan brytast ned

på kommunenivå, og då gi kommunane verdifull kunnskap som kan nyttast lokalt.

Planstruktur

Bjørnafjorden kommune meiner det vil vere ei styrke for det lokale klimaarbeidet at kunnskapsgrunnlaget for den regionale planen vil bli oppdatert løpande, og at det kan brytast ned på kommunenivå der det lar seg gjere.

Medverknad

Fylkeskommunen legg opp til ei brei og omfattande medverknadsprosess i arbeidet med planen, og har allereie henta innspel frå kommunane når det gjelde plantema. I det vidare arbeidet er det viktig å lytte til kommunane, sidan dei (som de peikar på i medverknadskapitlet) «...har mykje av ansvaret med å bidra i klimaomstillinga». Det er og positivt at fylkeskommunen vil nytte Klimapartner-nettverket i planprosessen. Det er etablert ei eiga nettside for arbeidet med planen, dette gjer det enkelt for kommunane å følgje med i arbeidet. Bjørnafjorden kommune har meldt seg på det digitale høyringsmøtet som er invitert til 25. mai, og ser fram til å få kome med innspel i det vidare arbeidet. Fylkeskommunen har etablert eit nettverk for kommunar som skal lage eigne klimaplanar, og vi vonar at dette nettverket og vil få medverke i prosessen kring regional plan for klima. Dette nettverket er viktig for kommunane i Vestland – for å skape dialog og for å forankre felles løysingar på utfordringar som er for store for den enkelte kommune.

Utgreiingsbehov

Det er veldig bra at fylkeskommunen ser for seg å utarbeide indikatorar for måla i den nasjonale klimaplanen, dette kan vere til stor hjelp for kommunane i sitt arbeid. Det same gjeld på arealrekneskap.

Det er også positivt at fylkeskommunen vil framskrive klimagassutslepp, og vonaleg vil dette kunne brytast ned på kommunenivå.

Konklusjon

Bjørnafjorden kommune meiner planprogrammet som no er på høyring lovar ein god regional plan for klima som vil vere ei rettesnor og til god hjelp for kommunane i sitt lokale klimaarbeid.

Kommunen ynskjer å understreke at det er avgjerande for det regionale klimaarbeidet at fylkeskommunen bidreg med gode strategiar og tiltak, oppdaterte kunnskapsgrunnlag og til slutt, men kanskje viktigast, målretta verkemiddel for å hjelpe kommunane. Dette kan bidra til at den regionale planen for klima faktisk blir eit hjelpemiddel i kommunane si klimaplanlegging.

Bjørnafjorden, den 18.05.2021
Birte Aasen
Samfunnsplanleggar